


永樂大典

卷七千七百一  
之七千七百二



永樂大典卷之七千七百一

十九唐

京

南京

地理通釋唐肅宗實錄至德二年改蜀郡為南京以荊州為南都州曰江陵府其蜀郡先為南京宜復為蜀郡南京應天府關

伯所居商丘周為宋國漢為梁國隋唐為宋州太祖以歸德軍節度使即位定有天下之號曰宋景德三年升應天府祥符七年升南京正殿曰歸德高宗即位于此宋會要真宗景德三年二月詔曰睢陽與區平臺舊壤兩漢之盛並建於威藩五代以還荐升於節制地望雄於征鎮疆理接於神州實都畿近輔之邦乃帝業肇基之地恭惟聖祖誕慶鴻圖爰於歷試之初兼領元戎之寄謳謠所集符命存臻殆茲累朝俯同列郡式昭茂烈宜錫崇名用彰神武之功且表興王之盛宜升為應天府宋城縣為次亦寧陵楚丘柘城下邑穀熟虞城等縣並為次畿大中祥符七年正月二十九日詔曰睢水名區實一方之都會商丘與壤為三代之舊邦形勢表於山河忠烈存於風俗惟文祖之歷試蓋王命之初基今者伸欵謁於檜庭

既揚茂則徇篋來於竹苑。方霈湛恩。期克壯帝猷。俾肇所京邑。用志興王之  
地。允符追荐之心。應天府宜升為南京。正殿以歸德為名。咨爾都民。承  
予世德。慶靈所佑。感悅良多。二月一日。詔名南京門曰崇禮。雙門曰祥輝。  
外西門曰迴鑾。三日。以主客郎中。知應天府馬元方兼南京留守司事。合  
置官屬名。目下審官院流內銓。一如西京之式。三月十三日。詔名南京城  
大東門曰昭仁。小東門曰延和。小西門曰順成。北門曰靖安。新隔門曰承  
慶。仁宗慶曆五年。九月十八日。置南京留司御史臺。燕翼詒謀。真宗皇帝  
東封西祀。思顯先烈。大中祥符七年。正月乙卯。詔升應天府為南京。建行  
宮正殿以歸德為名。以聖祖殿為鴻慶宮。奉太祖太宗像侍立於聖祖之  
旁。其後遂開高宗皇帝中興之祥。殆非偶然者。宋史列傳。朱勝非。靖康元  
年。為東道副總管。權應天府。金人攻城。勝非逃去。會揚進破敵。復還視事  
踰年。詣濟州謁康王。言南京為藝祖興王之地。請幸之以圖大計。王即位  
南京。建炎改元。夏文莊公集乞修南京內狀。右臣伏觀大中祥符七年。  
二月一日。赦勅節文。應天府升為南京。正殿以歸德為名。臣到職後。躬詣  
大內。謹視苑籥。其正南內門上有先朝題其榜曰。重熙頌慶之門。樓皆損  
動。其下只是依舊雙門。未變列郡之制。雖有兩觀雉堞。又無朵樓。內城之

中並無歸德之殿。但是頽垣茂草。內有真宗皇帝御製御書南京頌駐蹕  
詩碑石一片。小屋遮蔽。未曾建立。其東北隅小亭子一座。內有先皇御製  
御書駐蹕詩四首。粉版門牖不嚴。塵埃所闇。臣職在居守。理合奏陳者。伏  
以商丘仰當大火。寶勢形勝。佳氣鬱葱。藝祖肇基之邦。聖朝根本之地。發  
祥薦祉。應天順人。由七十里而典。天乙是資。於景毫累三十世之王。文昌  
始大於岐周。用建名都。寔陪上國。與中天而對峙。企洛宅以相望。至于官  
局。解居咸從改革。而乃闕廷宮掖。悉未繕修。漢啓南陽之都。唐重北門之  
館。並資壯麗。以示威神。况茂陵之餘烈。方宣真廟之鳴鑾。未遠必欲仰模  
太紫。上憲甯備九寢之儀。敞千門之式。慮煩力役。或有費財。征臣今乞  
依先朝勅旨。只創歸德一殿。安駐蹕詩版。又以宮室之儀。門闈為重。猶取  
諸侯之制。未成王者之都。欲乞於南端闢正門三闔。東西增朵樓二座。所  
貴它工至鮮。不日可成。仍乞選差八作司。臣寮將帶工匠。到此計度。却於  
東京木場事造材植。繫棧浮汴。赴當京修蓋。伏望聖慈。特賜開可。所貴宮  
闕之度。稍合於彝章。祖始之基。益隆於景命。有光鴻祚。永膺皇圖。歐陽公  
集南京謝上表。皇祐二年七月。臣某言。伏蒙聖恩。就差臣知應天府。兼南  
京留守司事。臣已於今日二十四日。赴上訖者。守宮鑰之謹嚴。敢忘夙夜。

布政條之纖悉。上副恩憂。寄任非堪。兢營並集。臣其中謝。伏念臣賦才庸薄。稟數竒屯。毀譽交興。兩嘗過實。寵榮踰分。動輒招尤。念報效之未伸。敢不竭忠而盡瘁。困風波之可畏。則思遠去以深藏。迨此六年。外更三守。學偷安而杜口。負素志以媿心。朽質易衰。已凋零於齒髮。良時難得。尚希慕於功名。豈謂皇慈。未捐舊物。擢從支郡。委以名都。惟此別京。舊當孔道。簿領少勤於職事。厨傳取悅於路人。苟循俗吏之所為。雖能免過。非有古人之大節。未足報君。**梅聖俞宛陵集**送王宗說寺丞歸南京。晏歲欲飛雪。滿天含凍雲。犯寒單騎速。獵吹紫裘薰。庭鵲還先喜。池鴻去始聞。公應問貧賤。善說莫如君。送韓簽判王汝還南京。持質太禮表。天子甘泉祀。歡聲浹九圍。綠章馳騎入。朱服佩魚歸。賦雪上賓席。買鬃更舞衣。清池無限鴈。莫道信音稀。**虞倚尊白堂集**過南京。三蘇當日振英華。下榻相看意已佳。太息樂全無復見。舊廬聞屬女真家。**許綸詩**宿南京。詢訪實有戍兵三千人。宋城城下縣。虛說胡屯五萬兵。淒涼無復舊南京。中天王氣終當復。千古封疆只宋城。**洪适盤洲集**次韻南京道中。密葉成陰行路寬。鳴鶯轉足開顏。半塗泥滑夜來雨。數片雲飛何處山。薄暮每尋樽俎共。殘春能伴節旄還。塵襟好濯西湖水。偷取禪房一日閑。送劉元忠學士還

南京。昔見相公登瀛洲。今見公子為校讎。鯤鵬變化三十載。我生安得不白頭。君前拜恩父前慶。暫向南都乘順流。南都留守頗為喜。將吏入賀靴聲道。酒舛銀篦羊鬻炙。上下和煦移涼秋。歸來却上柳堤路。西風健馬控花虬。**曾丰詩**送孫莘老移知南京。推年曾未覩風標。瀚海初聞拔俊髦。國子先生曾並席。曾在胡先生講下。蓬萊學士看揮毫。量涵萬頃滄溟濶。氣吐千尋太華高。迷性妙思窮孔孟。公有十述迷性是其一也。指南餘藻屈雄褒。爾雅之指魁談經落落鑑道鐸。作直講飛步僊僊踏海鼇。試館職忠力敢前輕履尾。剛腸一決快吹毛。歸來有意成陶賦。謫去無言吊楚騷。志不下人寧碌碌。特非知我但囂囂。吳江春水尋幽寺。知湖州越嶺秋風聽怒濤。移知福州宣室鬼神靈語斷。長安鍾鼓夢思勞。廣陵南隔迷桑梓。泗水東來照節旄。知徐州威憺四隅消警吠。惠流比屋樂耕縹。真仙應祝通時澤。朽骨平寬息夜號。蕭洒幅巾忘夢覺。清涼丈室笑燻膏。淮陽大節孤尤峻。吏部雄材晚更豪。濫使執經稱弟子。虛煩解榻下功曹。曾迷馬祖山前鹿。頓悟華亭水底鷺。細扎忽聞更屏翰。高牙俄見列弓刀。照回天子今方晤。怒拂龍顏昔未遭。屈指陪京非久駐。太平功業待伊臯。**遼史**南京析津府。本古冀州之地。高陽氏謂之幽陵。陶唐曰幽都。有虞析為幽州。

商併幽於冀。周分并爲幽。職方東北幽州。山鎮醫巫閭。澤藪獫狁。川河滹  
浸。蓄時其利魚鹽。其畜馬牛豕。其穀黍稻。武王封太保奭于燕。秦以其地  
爲漁歸。上谷右北平遼西東五郡。漢爲燕國。歷封臧荼盧綰。劉建劉澤。劉  
且常置涿郡廣陽國。後漢爲廣平國。廣陽郡。或合于上谷。復置幽州。後周  
置燕。及范陽郡。隋爲幽州總管。唐置大都督府。改范陽節度使。安祿山史  
思明。李懷仙。朱滔。劉怱。劉濟。相繼割據。劉總歸唐。至張仲武。張允仲。以上  
得民。劉仁恭父子僭爭。遂入五代。自唐而晉。高祖以遼有援力之勞。割幽  
州等十六年以獻。太宗升爲南京。又曰燕京。城方三十六里。崇三丈。衡廣  
一丈五尺。敵樓戰櫓具八門。東曰安東迎春。南曰開陽丹鳳。西曰顯西。清  
晉北曰通天。拱辰。大內在西南隅。皇城內有景宗聖宗御容殿二。東曰宣  
和。南曰大內。內門曰宣教。改元和外三門曰南端。左掖。右掖。改萬春。  
右掖。改千秋。門有樓閣。毬場在其南。東爲永平館。皇城西門曰顯西。設而  
不開。北曰子北。西城顛有涼殿。東北隅有燕角樓。坊市廨舍寺觀蓋不勝  
書。其外有居庸松亭。榆林之闕。古北之口。桑乾河。高粱河。石子河。大安山。  
燕山。中有瑤輿。府曰幽都軍。號盧龍。開泰元年。落年額。統州六。縣十一。兵  
衛志。南京析津府統縣十。轄軍府州城九。有丁五十六萬六千。金史地理

志。南京路。國初曰汴京。貞元元年。更號南京府三。領節鎮三。防禦八。刺史  
郡八。縣一百五。都城門十四。曰開陽。曰宣仁。曰安利。曰平化。曰道遠。曰宜  
照。曰利川。曰崇德。曰迎秋。曰廣澤。曰順義。曰迎朔。曰順常。曰廣智。宮城門。  
南外門曰南薰。南薰北新城門。曰豐宜。橋曰龍津。橋北門曰丹鳳。其門三。  
丹鳳北曰舟橋。橋少北曰文武樓。遵御路而北橫街也。東曰太廟。西曰郊  
社。正北曰承天門。其門五。雙闕前引東曰登聞檢院。西曰登聞鼓院。檢院  
東曰左掖門。門南曰待漏院。鼓院西曰右掖門。門南曰都堂。直承天門北  
曰大慶門。門東曰日精門。又東曰左昇平門。大慶門西曰月華門。又西曰  
右昇平門。正殿曰大慶。殿前有龍墀。又南有丹墀。又南曰沙墀。東廡曰嘉  
福樓。西廡曰嘉瑞樓。大慶後曰德儀殿。殿東曰左昇龍門。西曰右昇龍門。  
正門曰隆德。內有隆德殿。有蕭牆。有丹墀。隆德殿左曰東上閣門。右曰西  
上閣門。皆南向。鼓樓在東。鍾樓在西。隆德之次曰仁安門。仁安殿東則內  
侍局。又東曰近侍局。又東則嚴祗門。宮中則稱曰撒合門。少南曰東樓。則  
授除樓也。西曰西樓。仁安之次曰純和殿。正寢也。純和西曰雪香亭。亭北  
則后妃位也。有樓。樓西曰瓊香亭。亭西曰涼位。有樓。樓北少西曰玉清殿。  
純和之次曰福寧殿。殿後曰苑門。內曰仁智殿。有二太湖石。左曰敷錫神

運萬歲峯。右曰玉京。獨秀太平巖。殿曰山莊。其西南曰翠微閣。苑門東曰僊韶院。院北曰翠峯。峯之洞曰大滌湧。翠東連長生殿。又東曰湧金殿。又東曰蓬萊殿。長生西曰浮玉殿。又西曰瀛洲殿。長生殿南曰闕武殿。又南曰內藏庫。嚴祗門東曰尚食局。又東曰宣徽院。院北曰御藥院。又北右藏庫。東則左藏庫。宣徽院東曰點檢司。司北曰秘書監。又北曰學士院。又北曰諫院。又北曰武器署。點檢司南曰儀鸞局。又南曰尚輦局。宣徽院南曰拱衛司。又南曰尚衣局。其南爲繁禧門。又南曰安泰門。門與左昇龍門相直。東則壽聖宮。兩宮太后位也。本明俊殿。試進士之所。宮北曰徽音院。又北曰燕壽殿。殿坦後少西曰振肅衛司。東曰中衛尉司。儀鸞局東曰小東華門。更漏在馬中衛尉司東曰祗肅門。少東南曰將軍司。徽音壽聖東曰太后苑。苑殿曰慶春。與燕壽殿並。小東華門對東華門內正北尚廐局。其西北曰臨武殿。左掖門北尚食局。南曰宮苑司。其西北尚醞局。湯藥局。侍儀司。少西曰符寶局。器物局。又西則撒合門也。嘉瑞樓西曰三廟。正殿曰德昌。東曰文昭。西曰光興。德昌後宣宗廟也。宮西門曰西華。與東華相直。北門曰安貞。**洪武志**輿地志云。鍾山古金陵山也。縣邑之名。由此而立。建康實錄云。楚威王築城石頭。置邑。以其地接華陽。金壇之陵。故

號金陵。於天文其星斗牛。其次星紀。秦始皇三十六年。以金陵爲鄣郡。治故鄣。三十七年。東遊還。過吳。從江乘渡。望氣者言五百年後。金陵有天子氣。因鑿鍾阜。斷金陵。長隴以通流。至今呼爲秦淮。乃改金陵邑爲秣陵縣。諸葛亮所謂鍾山龍盤。石城虎踞。真帝王之宅。漢承三代舊制。置揚州。統丹陽郡。所領縣邑。有今浙西浙東二道。及浙東道之半。吳晉宋齊梁陳代。加分割。隋立蔣州。唐以隸潤州。又改昇州。管屬始隘於舊。南唐建金陵府。縣邑猶更屬不常。宋初爲江寧府。改建康府。始定有江寧。上元。句容。溧水。溧陽之地。東西二百三十五里。南北四百六十里。東抵鎮江。東南抵常州。南抵寧國。西南抵太平。西抵和州。西北抵真州。以大江中流爲界。本朝應運肇基。應天府實星紀斗牛之分。且與三統之正相協。自周以來數

千年間。

帝王之運。適符於今。豈非曆數耶。**應天府志**府境古揚州之域。周顯王時。越

滅吳。置金陵邑。秦改爲秣陵縣。漢爲丹陽郡地。建安十七年。改秣陵曰建業。三國吳建都于此。晉永嘉元年。琅邪王睿鎮建業。建興初。避愍帝諱。改建康。元帝建都于此。宋齊梁陳皆因之。號京輦神臯。隋平陳。置蔣州。治石頭。唐爲揚州。又改江寧。又改昇州。吳改金陵府。南唐建都于此。以爲西都。

昇州江寧府。宋爲江寧府。高宗建炎二年。改曰建康府。紹興二年。以府治爲行宮。號行都。元至元十二年。開行中書省。後改建康路。天曆二年。以文宗儲邸。改曰集慶路。

大明丙申年。改應天府。洪武元年。立南京。北京。詔曰。奉天承運。

皇帝詔曰。朕建邦基。以成大業。興王之根本。爲先。居中夏而治四方。立國之規模。至重。自趙宋末世。夷狄入主中國。今百有餘載。其運乃終。羣雄紛爭。未見有定于一者。民遭塗炭。亦已極矣。朕以布衣當擾攘之際。拔身戎伍。率衆渡江。

天地眷佑。

祖宗積德。臣下宣忠。三軍用命。西平陳友諒。東滅張士誠。南靖閩廣。北有中原。武功大集。混一之勢已成。十七年間。糧儲軍須。百物料徵。頻煩尤甚。民無休息者。皆江左一方。受供給之繁。遂致天下。收平寧之效。民初有助於朕。其可忘乎。頃幸大梁。詢及父老。皆曰。昔聖人居中國而治四夷。天下咸服。朕觀中原土壤。四方朝貢。道里適均。父老之言。乃合朕志。可不從乎。然立國之規模固大。而興王之根本不輕。以金陵大梁爲南北。朕於春秋往

來巡狩。駐守。播告爾民。使知朕意。至於立

宗社。建宮室。定朝市。南京既以創置矣。北京其令有司次第舉行於戲。江左開

基。立四海永清之本。中原圖治。廣一視同仁之心。故茲昭示。想宜知悉。

洪武京城圖志。春坊贊善王俊華圖志序。天地定位。山川啓奧。區之秘

宅。中考卜。河嶽壯金湯之固。况乎神臬聖壤。其所蓄也。深則其待於今也。大。

聖人應期啓運。故天發其藏。地闢其會。而體國經野之制。固有以軼豐鎬。而跨兩京者矣。金陵控扼吳楚。天塹繚其西北。連山拱其東南。而龍蟠虎踞之勢。昔人之言。蓋不誣也。孫吳始創居之。六朝南唐。雖代有其地。然而疆域之廣。未極其盛者。意者天之所兆。正有資於今日。以啓一代王業之隆也。

歟。歲壬辰。癸巳間。天厭元德。群雄並起。

皇上龍興淮甸。天戈南指。吳越首入版圖。乃默與神謀。即定都于。是辯方正位。

立洪基。造丕圖。而郊鄒之鼎。以定山。若增而高。水若增而深。回抱環合。獻奇貢異。而榮光佳氣。與斗牛星紀。並麗乎太微帝車之間。何其偉耶。樹本既固。乃命將出師。披山東。下河南。拔潼關而守之。遂北推幽燕。西臨汾晉。入陝右。盡有秦隴之地。凡元之餘燼。皆來請命于庭。故交廣之墟。羌燹之

聚推結丹裳之區。山梯海航。咸奉琛致貢。方軌畢至。而京師之壯。增飾崇麗。輪蹄交集。絲管喧競。歲時士女。填郭隘郭。其宏盛氣象。度越今古。豈區區偏方閏位之可媿擬哉。雖然。

皇上經營締構。蓋已極其盛矣。然而遐方遠裔。未覩其勝。無以知

聖謨經綸之至。爰詔禮曹。命畫者貌以爲圖。毫分縷折。街衢巷隧之列。橋道亭臺之施。名賢祠屋之嚴邃。王侯第宅之華好。星陳碁布。地有顯晦。而沿革不同。名有古今。而表著無異。凡所以大一統之規模者。可以一覽而盡得之矣。圖成。并鈇諸梓。且摹之。以徧示四方。使天下之人。足跡未嘗一至者。皆得覩其勝槩。亦若聞和鑾之音。望屬車之塵。於鈞陳豹尾間也。大矣哉。

皇上之英謀偉略。何其深且至耶。臣俊華遭際

明時。庇職春坊。謹拜手稽首而言曰。自古聖帝明王之有天下也。若夏殷之禪繼。周漢之龍興。唐宋之紹承。莫不奮自西北。徐起而有中土。然後始得而制東南耳。

皇上不階尺土。乃以吳越之疆。席卷中夏。永天丹傲之域。雕題金齒。斷髮文身之屬。莫不重譯而至。嘉禾靈草。諸福之物。史不絕書。天命之所係屬。如是夫。湛恩厚德。亘千萬年。

聖子神孫。承承繼繼。以保此無窮之基。覽是圖者。其尚有考於斯焉。又序詹事府丞杜澤。

聖人代天理物。爲億兆之君師。定天下之大業。宅形勝之都邑。不偶然也。如堯舜禹都冀。成湯居商。周都豐鎬洛邑。漢唐關中。有宋居汴。是皆統一海內。以安黎庶。此可見天降聖人。有造設默定之意焉。欽惟

皇上當元綱解紐之際。會

上天更運之時。應天順人。特起中夏。定都江左。四征弗庭。勝兵西上。陳虜殞滅。揚旗姑蘇。張氏面縛。天兵北討。中原以清。掃腥羶於幽朔。殄么麼於蜀都。群孽盡消。京畿已固。所謂大明當天。而燭火熄也。伏惟

皇上神聖聰明。深謀遠略。建泰山不拔之基。爲萬世無窮之計。詳內略外。經營邑都。其龍蟠虎踞之勢。長江衛護之雄。群山拱翼之嚴。此天地之所造設也。若乃紫微臨

金闕煌煌。黃道分玉街坦坦。城郭延袤。市衢有條。六卿居左。經緯以文。五府處西。鎮靜以武。如十廟以祀忠烈。十樓以待嘉賓。此



皇上之所經制也。以此觀之。京師天下之本。萬邦輻輳。重譯來庭。四海之所依歸。萬民之所取正。非遠代七朝偏據一方之可侔也。

皇上萬幾之暇。命工繪圖。昭示天下。臣叨近侍之列。仰瞻天日之光。幸覩斯圖。不勝感戴。一披而金陵形勝了然。心目之間。非若前代所觀。徒有其名。而莫能考其實也。嗚呼盛矣哉。因拜手稽首繫之以詩曰。地闢天開。金陵大哉。帝居允諧。鍾山巍巍。

聖德光輝。奄有九圍。大江滔滔。聖德深高。地載天包。鍾山蒼蒼。大江洋洋。

聖德隆昌。自西自東。朔南承風。車書混同。天命諄諄。聖子神孫。萬萬年春。愚臣拜手。

聖皇萬壽。天長地久。






永樂大典

永樂大典












宮闕	奉天殿	華蓋殿	謹身殿	奉先殿	武英殿	文華殿	乾
清宮	坤寧宮	柔儀殿	春和殿	文樓	武樓	文淵閣	東角門
樓	西角門樓	奉天門	東角門	西角門	中左門	中右門	後
左門	後右門	左順門	右順門	武英門	文華門	春和門	午
門	左掖門	右掖門	左闕門	右闕門	社街門	廟街門	端門
承天門	廟左門	社右門	長安左門	長安右門	洪武門	東	
華門	東上南門	東上北門	東安門	西華門	西中門	西上南	
門	西上北門	西安門	玄武門	北上東門	北上西門	北安門	
親蠶之門	已上皆宮門	朝陽	正陽	通濟	聚寶	三山	石城
清涼	定淮	儀鳳	鍾阜	金川	神策	太平	已上皆城門
滄							
波	高橋	上方	夾岡	鳳臺	大馴象	小馴象	大安德
德	江東	佛寧	上元	觀音	姚坊	仙鶴	麒麟
							已上皆外城門
山川	鍾山	一名蔣山	在城東北	周迴六十里	高一百五十八丈	東連	
青龍山	西接青溪	南有鍾浦	下入秦淮	北接雒亭山	漢末有秣陵尉蔣子		
文遜盜死	葬于此	吳大帝為立廟	封曰蔣侯	大帝祖諱鍾	因改曰蔣山		
石頭山	按輿地志	環七里一百步	緣大江南抵秦淮口	山上有城	因以		



爲名。吳孫權修理因改曰石頭城。今城於其上。甃以磚石。雄壯險固。甚得控制之勝。覆舟山。一名龍山。一名龍舟山。在今太平門內教場北。周迴三里。高三十一丈。北臨玄武湖。狀若覆舟。宋武帝又改名玄武山。鷄鳴山。舊名鷄籠山。在覆舟山西。周迴十餘里。高三十丈。狀如鷄籠。因名。今改鷄鳴山。宋元嘉中立儒館於北郊。命雷次宗居之。今置國子學於山之左。又建浮圖于上。以祠寶誌。石灰山。在城西北。二十里。周迴三十里。高十丈。晉元帝渡江。王導建幕府於此。舊名幕府山。上有虎跑泉。仙人臺。獅子山。在儀鳳門北。與馬鞍山接。周迴十餘里。高三十丈。又舊名盧龍。

國朝以其形名之。

馬鞍山。

在清涼門與石頭城相接。西臨大江。高十五丈。

以形似得之。

青龍山。

在城東南二十餘里。周迴二十里。高九十丈。

方山。

一名天印山。在城東南三十里。周迴二十餘里。高一百一十六丈。

四面方正如城。秦始皇鑿方山。長隴爲瀆。入江曰秦淮。吳大帝嘗爲葛玄立觀于此。聚寶山。在聚寶門外雨花臺側。上多細瑪瑙石。因名聚寶山。今置欽天回回監于此。牛首山。舊名牛頭山。狀如牛頭。因名。周迴四十餘里。高一百四十丈。一名天闕山。中有石窟。不測淺深。在西南二十

里。劉宋南郊壇在焉。三山。在城西南四十餘里。舊三山磯。周迴四十里。三峯連出大江。東岸高二十餘丈。吳津濟道也。太白詩云。三山半落青天外。即是。大江。自京城西南來。經西北東流入海。秦淮。舊傳秦始皇時。望氣者言金陵有天子氣。東游以厭當之。鑿方山。斷壘爲瀆。入江。故曰秦淮。玄武湖。亦名蔣陵湖。秣陵湖。在太平門外。周迴四十里。晉元帝所浚。以習舟師。又名北湖。宋元嘉中有黑龍見。因改玄武湖。有溝南入于秦淮。太子湖。一名西池。吳宣明太子所浚。晉明帝爲太子。脩西池。多養武士於內。築土爲臺。時人呼爲太子西池。梁昭明植蓮於此。在鷄鳴山北。聽舡湖。在佛寧門外。國朝新開通江水。於此泊舟。以避風濤。清溪。吳赤烏四年鑿東渠。石清溪。通城北。整潮濬。以洩玄武湖水。舊有九曲。今上元縣南。迤邐而西。循舊內府東南。出至府學墻下。皆清溪之舊曲。通秦淮。其竹橋。玄津。昇平。復成。淮清。栢川。鼎新。斗門。西虹。內橋。會同等橋。皆此水所通。太平隄。在太平門外。

國朝新築。以備玄武湖水。其下曰貫城。以刑部。都察院。五軍。斡事官在其西。皆執法之司。以天市垣有貫索星。故名焉。玉澗。在蔣廟側。綠山澗。是。

東澗。在鍾山。宋熙寺基之東。竹篠港。在觀音門外。去城三十餘里。天地壇。在正陽門外。山川壇東。按古以南北二郊分祭。掃地以行事。

國初嘗因之。風雨寒暑屢致弗調。

皇上斷自宸衷。以王者父天母地。無異祭之理。乃以

天地合壇而祭。配以

仁祖淳皇帝。嚴以殿宇左右列壇。以日月星辰。岳鎮海瀆。風雲雷雨山川。太歲。

歷代帝王。天下神祇。及府城隍之神。從祀。禮意極殷。定為萬世之制。每歲

率以正月中旬親祀。至為簡當。自此年穀順成。禎祥疊見。社稷壇。在

端門之右。舊嘗分祭。有乖禮意者多。

皇上歷考古制。互有不同。以為五土生五穀。所以養夫民者也。分而祭之。生物

之意。若無所施。於是合祭于一。春祈秋報。歲率二祀。太廟。在端門之

左。龍江壇。

國朝新建在金川門外。凡

行幸出師。親王之國。則祀于此。帝王廟。

國朝新創。凡古之聖帝明王。下及歷代開基創業之君。制治保邦之主。能遺

法於後世者。皆於此祀之。廟在鷄鳴山陽。城隍廟。南唐在城西北。元

在太廟街。

國朝初建斗門橋東。今在鷄鳴山南。真武廟。宋太平興國二年置。在清

化市東。今徙鷄鳴山南。卞壺廟。卽卞將軍廟。舊在朝天宮西冶城。晉

蘇峻作亂。尚書令卞壺與其二子盱眙死難。人謂忠孝萃于一門。南唐保

大中始建忠貞亭於其墓北。宋慶曆改亭曰忠孝。胡銓作記。

國朝建置鷄鳴山南。蔣忠烈廟。舊在蔣山之西北。神蔣姓。名子文。漢秣

陵尉。逐盜至鍾山。為賊所傷死。而為神。甚有異迹在人。吳大帝為立廟。歷

代皆祀之。

國朝建于鷄鳴山南。劉越王廟。舊在上元縣東。相傳南唐劉仁贍廟也。

國朝建置鷄鳴山南。曹武惠王廟。舊在聚寶門外。王諱彬。謚武惠。宋開

寶中統兵平江南。不殺一人。邦人感之。為立祠。

國朝建置鷄鳴山。元衛國公廟。公名福壽。元末為南臺大夫。

天兵下建康。死之。謚曰忠肅。

國朝為立祠。鷄鳴山。南春秋祀焉。功臣廟。

國朝建鷄鳴山南。凡本朝開國元勳。功在社稷。澤及生民者。則祀于此。五

顯廟。今建在鷄鳴山。關羽廟。舊在針工坊。宋慶元年間建。今徙鷄

鳴山南。徐將軍廟。在獅子山。晏公廟。在定淮門外。無祀鬼神壇。在神策門外。

寺觀。靈谷寺。梁之開善寺。唐改寶公院。南唐改爲開善道場。宋改太平興國寺。今名靈谷寺。徙鍾山東南。鷄鳴寺。在鷄鳴山。

國朝新建。置寶公塔於寺後之山巔。百福寺。在石灰山東。國朝所建。善世寺。元龍翔寺。在會同橋北。今改善世寺。徙聚寶門外。能仁寺東。宋定林寺基。天禧寺。即古長干寺。宋名天禧寺。在聚寶門外。有塔。今名因之。能仁寺。舊在應天府學西。劉宋建名報恩寺。南唐改

爲興慈院。宋改爲能仁寺。今因之。徙聚寶門外。善世寺西。碧峯寺。在聚寶門外。能仁寺北。

國朝所建。西天寺。在聚寶門外。天禧寺東。國朝所建。鐵塔寺。在朝天宮後岡上。宋太始中建。號延祚寺。唐時建塔

寺內。宋名寺曰正覺塔。曰普照。今有塔無寺。朝天宮。在建安坊西。吳冶城。晉西州。宋總明觀。楊行密建紫極宮。宋改天慶觀。元改永壽宮。今名

朝天宮。卞壺廟在其西。謝公墩在其北。神樂觀。在正陽門外。大祀壇西。

國朝新建。以居高道爲樂舞生者。大祭祀俾之。涖事。盧龍觀。在儀鳳門內。獅子山。

國朝新建。官署。文職。宗人府。在承天門外。御街東。吏部。在宗人府南。

戶部。在吏部南。禮部。在戶部南。兵部。在禮部南。工部。在兵部南。刑部。在太平門外。都察院。在太平門外。通政司。在

長安右門外。公生門南。太常司。在後軍都督府南。詹事府。在翰林院南。應天府。在舊內西。錦綉坊內。元御史大夫宅。光祿司。在

內城西。翰林院。在長安左門外。公生門南。太醫院。在詹事府南。欽天監。在太常司西。其測候臺。在鷄鳴山。欽天回回監。在聚寶

門外。其測候臺。在聚寶山。五軍斷事官。在太平門外。五城兵馬司。中城在今內橋北。六朝舊內門基。東城。在工部東。

西城。在三山門外。西關北街。北城。在更鼓樓北。南城。在聚寶門外。上元縣。宋在城東隅。今仍舊治。江寧縣。舊在聚寶門外。西

街。越城之側。今徙銀作坊內。係舊府治。行人司。在會同館西北。儀禮司。在長安街內南。僧錄司。在天禧寺。道錄司。在朝天宮。

禮司。在長安街內南。僧錄司。在天禧寺。道錄司。在朝天宮。

禮司。在長安街內南。僧錄司。在天禧寺。道錄司。在朝天宮。

禮司。在長安街內南。僧錄司。在天禧寺。道錄司。在朝天宮。

鑄印局。在禮部門內南。文思院。在大中街西。營繕所。在栢川橋北。宣課司。一在聚寶門外。一在龍江關。都稅司。在大中街。

巡檢司。一在江東渡。一在龍江渡。茶引所。在都稅司東。抽分場。一在瓦屑坳。一在龍江關。教坊司。在行人司南。

武職。中軍都督府。在承天門外御街西。左軍都督府。在中軍都督府南。右軍都督府。在左軍都督府南。前軍都督府。在右軍都督

府南。後軍都督府。在前軍都督府南。十二衛。錦衣衛。旗手旗金吾前衛。金吾後衛。羽林左衛。羽林右衛。府軍衛。府軍左

衛。府軍右衛。府軍前衛。府軍後衛。虎賁左衛。在京各衛。神策衛。虎賁右衛。驍騎右衛。天策衛。豹韜衛。飛熊衛。鷹揚衛

廣武衛。興武衛。英武衛。龍驤衛。留守中衛。留守左衛。留守右衛。留守前衛。留守後衛。瀋陽左衛。瀋陽右衛。龍江左衛。

龍江右衛。水軍左衛。水軍右衛。廣洋衛。龍虎衛。鎮南衛。江陰衛。應天衛。和陽衛。武德衛。橫海衛。

教場。在覆舟山南。即晉成帝北郊壇基。文武官朝房。在長街左右門外南北街。倉庫司局。鑿駕庫。在長

安左門外。軍儲倉。在鼓樓西馬鞍山下。及各衛營。黃冊庫。在玄武湖洲上。火藥局。在淮清橋街北。舊馬公洞基。寶源局。在火藥

局東。鞍轡皮作軍器顏料等局。在太平街西。橋梁。大中橋。即古之白下橋也。在通濟門裏。今名大中橋。淮清橋。

在大中橋西南一里許通秦水。舊名東水閘。今名淮清橋。鎮淮橋。在聚寶門裏。吳時南津橋也。名曰朱雀航。今名鎮淮。新橋。在今雜役

一坊驍騎衛口。本名萬歲橋。又改名飲虹橋。新橋。乃吳時所名。至今俗呼為新橋。襲其舊也。內橋。舊名天津橋。又名虹橋。即六朝舊內門也。在

宋行宮前。今名內橋。在中城兵馬指揮司西南。太平橋。在鼎新橋東。與建安坊相對。舊名欽化。又呼宣橋。古傳茅山宣宗師所建。宋改太平橋

今因名之。鼎新橋。在太平橋西。舊名小新橋。宋改鼎新。今因名焉。大市橋。在中城兵馬司西。舊名西虹橋。今名大市橋。會同橋。在大

市橋南。舊名閃駕橋。宋名景定橋。今名會同橋。跨運瀆水。昇平橋。舊名東虹橋。在上元縣西。今名昇平橋。乾道南北二橋。在今斗門橋北。

二橋相望。即古運瀆水道。今仍舊名。高橋。在通濟門外。吳皋伯通所建。因名其橋曰皋。後人轉皋為高。今因之。斗門橋。在今三山街。近三

建。因名其橋曰皋。後人轉皋為高。今因之。斗門橋。在今三山街。近三

建。因名其橋曰皋。後人轉皋為高。今因之。斗門橋。在今三山街。近三

山門。即運瀆水閘。今仍舊名。崇道橋。在朝天宮東。今仍舊名。大通橋。在今長安西門外。金水河所出。

國朝新建。通濟橋。在通濟門外。即古運瀆秦淮水也。今仍舊名。武定橋。在今織錦三坊內。今仍舊名。中和橋。在正陽門外。

國朝新建。江東橋。在今江東門外。來賓橋。在今聚寶門外。

國朝新建。善世橋。在今聚寶門外。來賓街西南。珍珠橋。在今洪武街。珍珠河水上。昔陳後主汎舟。遇雨浮漚生。宮人指之曰。滿河珍珠。因名馬。韓橋。在觀音門外。去城東北三十里。重譯橋。在聚寶門外東。重譯街。即古烏衣巷。朱雀橋也。今名重譯。

國朝新建。上浮橋。在新橋西。國朝新建。下浮橋。在上浮橋西北。

國朝新建。長安橋。在聚寶門外。古長干橋。五代楊溥城金陵。鑿濠引秦淮。繞城。今名長安橋。玄津橋。在

皇城西復成橋北。竹橋。跨清溪水上。在。國朝新建。

皇城西南。對栢川橋北。通太平門。栢川橋。在通濟街。復成橋。在玄津橋南。既壞而復成之。因以名焉。北門橋。在洪武街舊北門口。童橋。

在上方橋東南。上方橋。在中和橋東南。毛翁渡。在聚寶門外。瓦屑埧南。晉顧榮與陳敏戰於此處。榮以白毛羽扇麾軍。因名。毛翁渡。後訛稱毛翁渡。今名因之。

江東渡。瓦屑埧。舊毛翁渡。江東渡。在江東門外。舊名平家圩渡。今名

街市。長安街。在皇城西。長安門外。即舊白下橋東。大通街。在大中橋東南。接通濟門。北通

竹橋。里仁街。在大中橋西。宋程明道張南軒書院故基。今名里仁街。存義街。在里仁街西。宋上元縣學故基。特雍街。在存義街西。

和寧街。在特雍街西。中正街。在和寧街西。廣藝街。在上元縣西。舊名細柳坊。一名武勝坊。敦化坊。在中城兵馬司。六朝內城基。其

西元建龍翔寺。今天界寺故基。裕民坊。在太平門北街。舊真武廟街。建安坊。在鼎新橋北街。俗呼下街。善政坊。在大中橋西。舊名九

曲坊。務公街。在善政坊西。舊名青溪坊。致和街。在務公街西。舊清平橋街。大市街。在中城兵馬司西。故天界寺門外。舊名夾道街。

全節坊。在朝天宮西。舊名忠孝坊。晉卞壺死節處。今名全節坊。織錦一坊。在聚寶門內。舊桐樹灣街。織錦二坊。在鎮淮橋北。舊國子監街。織錦三坊。在織錦二坊北。舊闕王廟巷。大中街。在針工坊北。舊狀元坊。雜役一坊。在聚寶門內。鎮淮橋南沙河街。雜役二坊。在鎮淮橋北。舊竹街。雜役三坊。在雜役二坊北。建業坊。鞍轡坊。在雜役三坊北。銀作坊。在鞍轡坊北。舊金陵坊。鐵作坊。在弓匠坊東。舊小木頭街。弓匠坊。在鐵作坊西。舊舉子巷。醴匠坊。在弓匠坊西。舊水道巷。習藝東街。在習藝西街東。習藝西街。在皮作坊東。舊土街。皮作坊。在習藝坊西。舊評事街。洪武街。在北門橋東。英靈坊。在十廟西。成賢街。在國學前。太平街。在太平門南。大市。在大市街。舊天界寺門外。物貨所聚。大中街市。在大中橋西。三山街市。在三山門內。斗門橋左右。特果所聚。新橋市。在新橋南北。魚菜所聚。來賓街市。在聚寶門外。竹木柴薪等物所聚。龍江市。在金川門外。柴炭等物所聚。江東市。在東門外。多聚客商。商船隻米麥貨物。北門橋市。在洪武門街口。多賣鷄鵝魚菜等物。長安市。在大中橋東。內橋市。在舊內府西。聚賣羊隻牲口。六畜

場。在江東門外。買賣馬牛驢騾猪羊鷄鵝等畜。上中下塌房。在清涼門外。屯賣段疋布帛茶鹽紙蠟等貨。草鞋夾。在儀鳳門外。江邊。屯集枳木。

樓館。會同館。在長安街西。四方進貢使客所居。烏蠻驛。在會同館西。以待四夷進貢使人。龍江驛。在金川門外。大江邊。江東驛。在江東門外。大江邊。客店。一在長安街口。一在竹橋北。一在通濟街西。一在江東門內。南北街。以待四方客旅。鼓樓。在今北城兵馬司東南。俗名爲黃泥岡。鍾樓。在鼓樓西。酒樓。江東樓。在江東門西對江東渡。鶴鳴樓。在三山門外。西關中街北。醉仙樓。在三山門外。西關中街南。集賢樓。在瓦屑埧西。樂民樓南。樂民樓。在集賢樓北。南市樓。在三山街皮作坊西。北市樓。在南乾道橋東。輕煙樓。在江東門內。西關南街。與澹粉樓相對。翠柳樓。在江東門內。西關北街。與梅妍樓相對。梅妍樓。在江東門內。西關北街。與翠柳樓相對。澹粉樓。在江東門內。西關南街。與輕煙樓相對。謳歌樓。在石城門外。與鼓腹樓並。鼓腹樓。在石城門外。與謳歌樓並。來賓樓。在聚寶門外。來賓街。與重譯樓相對。

重譯樓。在聚寶門外。與來賓樓相對。叫佛樓。在三山街北。即陳朝進奏院故址。宋改報恩光孝觀。今即其地。爲叫佛樓。駱駝亭。在靈谷寺西南。郵鋪。一在通政司。一在鼓樓。一在應天府。一在安德門外。一在太平門外。養濟院。在金川門外。富樂院。一在武定橋東南。舊鹿苑寺基。一在聚寶門外東街。拘攔。一在武定橋東。一在會同橋南。

廐牧。牧馬千戶所。在朝陽門外。馴象千戶所。在正陽門外。養席房。在聚寶門外。猪羊六畜圈。一在江東渡口。一在龍江渡口。

園圃。

國家逾年海運糧儲。及隄防沿海倭寇。其成造船隻所用桐油棕纜。皆出於民。爲費甚重。

皇上矜恤民力。乃經營布置於朝陽門外。蔣山之陽。建立園圃。廣植棕桐漆樹。

各數千萬株。所以備

國家之用。而省民供也。漆園。在桐園北。桐園。在漆園南。棕園。

在桐園東。

南京賦并序。聶鉉。漢班固作東西都賦。鋪張兩漢之盛。千載而下。讀者

如身歷闕洛之間。而目睹高光之規模也。

皇明定都金陵。金陵在楚威王時占者。以爲有天子氣。後雖六朝建都。僅保東

南。未能混一區宇。皆未足以當是氣之盛。從

聖天子定鼎以來。東取三吳。南平江漢。西收隴蜀。北清沙漠。奄有六合。禮作樂

興。帝王統緒絕而復紹。衣冠文物墜而復振。整頓乾坤。再造中夏。曠古以來未之有也。王氣之應。其在

聖朝明矣。夫物之久而後成者。物必大而堅也。氣之蘊蓄久而後發者。其氣必綿延悠久。盛大而無窮也。

京師王氣占於二千餘載以前。而應在二千餘載之後。

聖朝億萬年盛大之業。於此見矣。鉉謹學爲

南京賦。因楮筆墨成文。假爲問答。以發其意焉。賦曰。管城子與子墨客。卿偕楮先生而登乎著作之庭。觀

帝鄉之佳氣。美

聖代之龍興。管城子首起而請曰。壯哉南京地勢。天成爲帝王州。今古所稱。然

而建鄴建康。金陵秣陵。凡幾更而定於今日。應天之美名。在昔六朝建都。相仍。至於今日。而天下一家。四海咸寧。豈天造地設。政有待於

皇明乎。子墨客卿曰。予知其一。未知其二。昔在荆楚威王之世。太史所占。北有王氣。爰開內府。輦金就瘞。彼欲以人而勝天。適見楚人之未智。由吳而晉。累朝相繼。未有混六合而為家。用中夏而變夷。則王氣之盛。彼皆何足以當之。且觀夫層城屹立。上出雲霧。老石嵯峨。鎮壓江滸。直兮若奮而欲前。曲兮若回而返顧。卑兮若有俟而蹲。高兮若有起而怒。所以像猛獸於秋方。表都城之神武。茲其所謂石城雄萬年而虎踞者歟。至若青山巒岷。峙乎雲端。大阜拱乎

皇居兮。如神物養道而不動。群峯立於城際兮。如頭角斬焉而鬱盤。削芙蓉兮。高峯走蜿蜒兮。長巒作擎天兮。一柱孕神秀兮。兩間茲其所謂鍾山亘萬古而龍蟠者歟。又如長江西來。下經洪都。匯為鄱湖。出于小孤。蓄怒湍悍。合川與漢。洪濤漲天。杳無畔岸。至于龍灣。洶湧瀾漫。茲其所謂天塹。昔人望之而興歎者歟。疏為支江。遠城盤迴。橫以闕梁。相望崔嵬。經乎水門。引乎城中。溝渠流灌。潮汐相通。萬里舟航。帆檣蔽空。際天薄海。靡不來同。是以三吳為其東府。荆蜀為其西戶。南有嶺海之險。北有河濟之固。青山遠聳兮。若圖畫之遙分。翠壁傍擁兮。如厚藩其重護。崇岡脊起。平阜四迤。今居衆大。古稱佳麗。東南都會。天下形勢。民秀常居乎第一。士勇實當乎百

二。思昔六朝既歇。天運未回。夕陽落烏衣之巷。浮雲蔽鳳凰之臺。蓋后皇蓄其竒而不發。將久閉而大開。厥後戰馬嘶風。群方鼎沸。積骸如山。穢腥天地。

聖皇赫怒。義旗斯起。臨江按劍。鯨波如砥。開門送款。生民有

主。定鼎于茲。永固根柢。已而東征西怨。敵無堅壘。掃除殘暴。天下同軌。然後開新城。拓邦畿。倚鍾阜。建

皇基。不必茅茨以昭儉。不必壯麗以重威。宮牆環遠。觀闕翬飛。為人間之天上。法星象於太微。碧瓦煥朝陽而共耀。瑤階與夜月以同輝。奉天弘開。高臨五雲。青龍翼翼乎內殿。玄武赫赫乎北門。

聖人以天下為重。而堂曰大本。

聖人不自以為聖。而殿曰謹身。環珮珊珊。雲氣飄來於僊仗。冕旒穆穆。日華絢彩於彤庭。東則青宮高明。

儲君所居。廣廈細氈。首德詩書。究典禮於姬周。講心法於唐虞。紅雲開兮寶殿。宮花明兮綺疏。脩問安之至敬。踵聖王之弘模。外則中書之堂。丞相之府。是為鳳凰之池。武展夔龍之武。為千官兮表率。使百揆兮時叙。六卿分職。理政事之樞機。四海晏安。見燮調之丕緒。爰開督府。兵事攸歸。風動雲

輿如虎如貔。飛將集而鐵駝戾止。三邊靜而羽檄不飛。白日耀光於甲冑。蛟蛇舞影於旌旗。府衛森嚴。克張

皇威。並列崇臺提憲之綱。豸冠白簡。烈日秋霜。駉馬蹀躞乎秋風。柏鳥翔舞乎朝陽。表正百司。令肅萬方。又若史官載筆。詞翰之林。雅誥其文。金石其音。載立辟雍。湯湯其流。天下俊髦。來歌來游。禮樂之司。天文之署。尚鑿大僕。百職具舉。雍雍鸞鳳之儀。濟濟鴛鴦之侶。莫不環拱

皇居。承恩

帝所。左則清廟於穆。層構岩崑。禘嘗尊

祖。駿奔百僚。南建負丘。北開方澤。天地定位。百神受職。歷代帝王。儀容儼飭。有德有功。總歸廟食。歆于神人。萬世丕式。爾乃御溝溶溶。逸手宮牆。長橋卧晴虹之曉。恩波耀紅旭之光。天連

御路。地轉長廊。雲集芳有街。會同芳有坊。爾公爾侯。甲第出雲。高門大宅。表其華勛。下逮閭閻。生齒孔殷。接棟連甍。隘乎通城。地因表著。營以衛分。崇墉屹屹。廣路迢迢。四門既開。重譯來朝。行人駕肩於廣市。舳艫街尾於關橋。雲起北山。灑溥天之霖雨。風生滄海。送及時之信潮。若乃江山之奇。風景之勝。地勢之雄。人物之盛。所以壯四海之游觀。播名賢之歌詠。並天

地以流傳。亘古今而莫盡者。皆有待於皇明之受命也。故知天地儲祥。于茲有年。應在

明時。孰云不然。吾方與子游乎禮義之林。樂乎熙皞之天。播頌聲於

昭代。托金石而永傳。管城子聳然而聽。釋然而悟。楮先生曰。卿言得矣。猶有

所未盡也。夫天祐中原。冠裳禮義。眷而為夷。夫豈天意。天以

聖皇紹中華之正統。開萬世之太平。變左衽而衣裳。易椎髻而冠巾。制禮作樂。

惠此烝民。整頓乾坤。天地一新。萬世一特。千載

一人。夫豈山河之險。能為其重輕。言未既。二子憮然拜且謝曰。微先生言。知不

足以及此。夫運氣回於天。而

聖皇當其會。王氣應於地。而

聖朝當其時。固不待金乎城。湯乎池。而開萬億年之丕基也。蘇伯衡詩

天作山川奠

帝京。大江為塹。石為城。安西事業。資吳漢。治內人材。得孔明。牧馬已空。燕地草。射雕敢近。漢家營。功成不用。論封禪。自有鳧鷖。頌太平。

聖主當陽。御六龍。真成垂拱。定華戎。十年遠見。文明盛。五緯行。瞻次舍。同穀旦。籍田稽古典。成王周業始。幽風告成。又見行封賞。共喜天山早挂弓。

聖心淵默事彌綸。朝御乾清夕謹身。王氣萬年當建業。龍光半夜起天津。自緣

廟筭成功速。終見殊方送款頻。甘露頌成齊入奏。蒼龍闕下候雞人。芍

藥名花簇坐圍。詞林寵遇眼中稀。論思惟日趨三殿。奉引常時近六飛。半

夜金蓮天上賜。幾回玉佩月中歸。青袍多幸微班忝。祇愧無能補舜衣。

釋 來復詩南京四首 龍虎山河御氣通。遙瞻

帝闕五雲紅。英雄盡入江東籍。將帥多收薊北功。禮樂日稽三代盛。梯航歲貢

萬方同。都將儉德熙文治。溥俗應還太古風。黃道天清擁佩珂。東南王

氣秣陵多。江吞彭蠡來三蜀。地接昆侖帶九河。鳳閣曉霞紅散綺。龍池春

水綠生波。華夷混一歸

真主。端拱無為保太和。列郡徵材起俊髦。萬機獨使

聖躬勞。開藩上相頒龍節。破虜將軍說豹韜。地入黃圖三輔壯。天垂華蓋七星

高。迎春別賜瑤池宴。捧進金盤五色桃。曙鍾催入紫宸朝。列炬流虹騃

絳霄。天近鰲頭花簇仗。風低豹尾樂鳴韶。衣冠一變無夷

俗。律令曾頒有正條。昨日鍾山甘露降。玻瓈滿賜出宮瓢。

# 永樂大典卷之七千七百一

# 永樂大典卷之七千七百二

十九庚

## 京

## 北京

地理通釋北京大名府。漢屬魏郡。後周置魏州。唐置天雄軍。後唐建鄴都曰興唐府。晉建鄴都曰唐晉府。後漢曰大名府。慶曆

二年升為北京。正殿曰班瑞。宋史地理志慶曆二年。建大名府為北京。宮

城周三里一百九十八步。即真宗駐蹕行宮。宋會要仁宗慶曆二年五月

詔曰。相色設都。所以因地形之勝。省方展義。所以考民風之宜。乃眷魏郊

實當河麓。席萬盈之懿兆。冠千里之上腴。隱然北門。壯我中夏。洪惟聖考。

順駐調輿。宮館並存。威靈如在。緬懷凝烈。有述於孝思。嘉慰後來。敢忘於

時邁。載恢舊制。崇建別京。懋昭善繼之猷。仍奠維新之澤。大名府宜居為

北京。先朝駐蹕行宮。正殿以班瑞為名。其修葺行宮屋宇。並給官錢。毋得

科率。六月十七日。以樞密副使右諫議大夫任中師為修建北京使。翰林

學士尚書禮部郎中知制誥史館修撰蘇紳為修建北京副使。七月十二日。以北京行宮門為順豫。八月十七日出內藏庫緡錢十萬。修北京行宮。

閏九月一日詔比建北京。以備巡幸。其供擬之物。宜令有司辨置。毋或擾民。三年二月六日。北京行宮便殿爲靖方。七年六月二十一日。置北京留守司。御史臺。神宗熙寧八年十二月九日。賜內外城門名。南河門曰景風。南博門曰身嘉。朝城縣門曰安流。朝城羅門曰巽齊。冠氏門曰華景。冠氏羅門曰春祺。上水關曰善利。北河門曰安平。北博門曰耀德。魏縣門曰寶成。魏縣羅門曰利和。觀音門曰安正。觀音羅門曰靜方。下水關曰永濟。左右四廂凡二十三坊。永寧。延福。靖安。惠安。宜春。敦信。安仁。善化。七賢。大安。德教。宜春。崇化。三市。普寧。廣利。長樂。景行。景明。鳳臺。延康。福善。保安。玉海。崇寧四年七月丁巳。京畿四面置輔郡。以澶鄭許三州升襄邑爲拱州。是爲四輔。景祐元年三月升鄭州節鎮。詔曰。周制九畿。蓋尊案內。漢設二部。實陪京師。相宅浚都。夾右榮園。爰稽扶翊之義。參領防遏之兵。皇祐五年十二月壬戌。以曹陳許鄭滑州爲輔郡。隸畿內。置京畿轉運使。至和二年十月己丑。詔京畿毋領輔郡。范仲淹謂洛陽險固。而汴爲四戰之地。太平宜都汴。卽有事。必都洛陽。可漸廣儲蓄。繕治宮室。宋強祠部集代王君貺尚書北京謝上表。臣某言云云環封千里。開府萬兵。坐制北方。据非其地。班條云始。負愧于中。中謝載惟全魏之區。遐控強胡之境。洪河襟帶於其左。朔

野咽喉之所衝。自罷郡以置都。常擇人而作屏。地望茲重。朝僉愈艱。曾紆兩府之印章。方付北門之管鑰。授之近侍。誠曰曲恩。伏念臣少也。短能。初無遠業。先朝親試之次。榜甫冠首。叨於甲科。臺省回翔。藩維偃息。犬馬之年尚壯。鴻鴻之序徧揚。蒼鬢嚴塗。覩顏空食。鄉領中山之一道。兼提支郡之十城。尤幸匪才。適丁無事。日常安枕。歲聿更書。未瞻天日之清光。敢圖省錄。又乏消塵之素效。何所甄陞。就畀別京。弗沿曩制。仍加冢宰之秩。以示邦人之榮。此蓋伏遇皇帝陛下。神造曲成。乾綱獨運。揀法官之新治。念仁廟之舊臣。特躡彝章。俾尸甸服。敢不刺求民瘼。兔講武經。謹胝河防之虞。豫嚴邊瑣之備。報償恩施。猶知今日之能爲。揭立功名。豈獨少年之所慕。云云。又代魏公北京謝上表。獨當一道。尚容掬竭於微才。兼拊連城。寔恐難勝於重任。肇班寬詔。深愧厚恩。中謝伏念臣風力不強。器能寔謨。致身奚識於枉道。接物唯存於至誠。朝廷非繫於重輕。將相輒更於出入。且所臨皆劇。精神已耗於當年。而其得過多。疾病遂乘於今日。方戢勦飛之翼。少安舊集之林。甫爾涉春。遽然易地。大稱全魏之部。北控強胡之疆。比雖水害之稍平。茲尚民流之未復。冀蘇疲俗。爰屬老臣。顧無惠術。以安人。慮乏威聲。之服虜。始懇辭而弗獲。訖冒處以爲慙。此蓋伏遇皇帝陛下。

政在圖新。任先求舊。特自清衷之所東。不惟繇力之弗堪。敢不蒐講武經。道宣利澤。殘軀黽勉。儻偶立於事功。睿旨丁寧。庶弗孤於器使。劉公是先

**生集**

魏京詩并序上二十年始建北京。以章明先帝巡守之德。以達孝思

于下。于時野之處士或相與議曰。蓋文王都豐。武王都鎬之間。不能數百

里。文武之位不過侯伯。而詩人乃以聖人之德。天子之事歌之。有如聖朝

德位相伴。述作相繼。而無適駿烝哉之詩。此乃處士之罪。非公卿之過也。

乃考聲謨辭以繼大雅。垂之無窮。其文曰。皇作大都。大都雄雄。奄定北

國。四方來同。皇曰卿士。在昔聖考。祇適文武。維慈幼老。天監在上。既有明

德。乃命于下。罔有不服。匪允命之。亦章慶之。匪允服之。亦保育之。特維獵

狝。侮予之疆。靡度靡虞。跳呼以狂。業業烝黎。載震載驚。侵魏及瀆。群心不

寧。帝奮厥武。首萬其士。匪怒以棘。于三十里。如虎如貔。如霆如雷。靡有遠

邇。天子其來。天子來止。士增其喜。孰偷其生。以不奮興。軀之渾渾。攘之賁

賁。靡有輟張。殲厥鯨鯢。或獻其寶。或請其命。帝振于旅。維時既定。屹屹魏

土。山河之固。匪山河則固。維上帝伊怒。既闕爾弓。既橐爾矛。獵狝臣止。四

方是休。皇曰卿士。聖考之德。允于孝思。孝思維則。爾眎示魏。以作我都。以

赫厥靈。俾後勿踰。皇曰卿士。維帝特功。特亦維人。維寇萊公。爾慎爾止。彌

予于治。期爾前人。用迪爾事。皇曰卿士。維帝作武。岳是萬年。莫敢予侮。泰

山之封。后士之禪。予監若茲。維天是眷。翼翼魏土。天子國之。穆穆原廟。聖

人則之。孰為強暴。敢不來覲。俾怛于威。于忠是訓。顯顯天子。孝德自躬。率

是休烈。覃之北戎。河水東注。昭哉禹績。特萬斯年。天子之德。金史地理志

北京路府四領節鎮七。刺郡三。縣四十二。鎮七。寨一。大定府中

年更。為北京。置留守司。都轉運司。警巡院。產昭。犀。螺。孟。萊。莫。梳。玳。瑁。鞞。酥。

乳餅。五味子。戶六萬四千四十七。縣十一。鎮二。元史大都路。唐幽州。范陽

郡。遼改燕京。金遷都。為大興府。元太祖十年克燕。初為燕京路。總管大興

府。太宗七年置板籍。世祖至元元年。中書省臣言。開平府。闕庭所在。加號

上都。燕京分立省部。亦乞正名。遂改中都。其大興府仍舊。四年始於中都

之東北置今城。而遷都。馬京城右擁太行。左挹滄海。枕居庸。奠朔方。城方

六十里。十一門。正南曰麗正。南之右曰順承。南之左曰文明。北之東曰安

貞。北之西曰健德。正東曰崇仁。東之右曰齊化。東之左曰光熙。正西曰和

義。西之右曰肅清。西之左曰平則。海子在皇城之北。萬歲山之陰。舊名積

水潭。聚西北諸泉之水流入都城。而匯於此。注。洋如海。都人固名焉。恣民

漁採無禁。擬周之靈沼云。事類全書中統五年八月日中書省奏開平府闕庭所在加號上都外。燕京修營宮室。分立省部。四方會同。乞亦正名事。準奏可稱中都路。其府號大興。布告中外。咸使聞知。到京須知。凡朝京到良鄉。取京止六十里。先詣燕賓館換衣亭。換易衣冠。然後入覲。元耶律楚材湛然居士集過燕京和陳秀玉韻。回首親朋半土丘。嗟予十稔浪西遊。半生兵革慵開眼。一紙功名暗點頭。下士笑予謀計拙。至人知我謂心憂。再行不憚風沙惡。鶴迹雲蹤任去留。君恩猶未報山丘。自笑遐方汗漫遊。客過玉關驚白髮。夢遊金谷覓蒼頭。冷官待罪予爲歎。陋巷居貧君不憂。猶望道行澤四海。敢辭沙漠久淹留。孤死曾聞尚首丘。悲予去國十年遊。崑崙碧嶂日落處。渤海西傾天盡頭。君子云亡真我恨。斯文將喪是吾憂。尚期晚節回天意。隱忍龍庭且強留。餘生不得樂林丘。猶憶丁年選勝遊。幾帙殘編聊快眼。一張袖被且蒙頭。魏貅已報西門役。柱石猶懷東顧憂。自料荒疎成弃物。兔喪歸計乞封留。空驚滄海變陵丘。白晝分明夢裏遊。除妄楔邊重出楔。求真頭上更安頭。亨通富貴剛生喜。苦惱悲愁強作憂。斫斷葛藤閑使倆。繫驢馭子不須留。洪武元年立大梁爲北京。見南京詔下。永樂元年正月十五日早。

欽依北平立爲北京。合設衙門官制。恁禮部與多官人議來。除欽遵會同各部都察院通政司大理寺等衙門官。議得合設北京留守行後軍都督府。北京行部。并屬司及北平府改爲順天府。官制仍舊。北京國子監。北京所屬生員仍照舊制。赴京攷試。上等送國監中等送北京國子監讀書。北京行太僕寺。并知印吏典名數。及行移定式。本年二月初三日。本部官同各衙門官。具本覆奏。

欽該都准議。除北京留守行後軍都督府。合設正官左右都督。及都督同知。都督僉事。行移兵部銓除。及銷除北平布政司。北平按察司。北平都司。經歷司。官制并附寫。今設衙門官制。行移禮部拘銷鑄換印信外。前項衙門除順天府官負品級照舊外。其餘衙門官負俱照在京官負品級。及照在京刑部戶部所屬北平清吏司。都察院所屬北平道。俱合改爲北京清吏司。北京道。再照北京既照在京設置北京留守行後軍都督府。北京行部監寺所據各衙門官吏知印攷滿。俱各照依在京官吏知印攷滿事例一體攷覈黜陟。及照資格出身。衙門官制。

北京留守行後軍都督府。經歷司。首領官經歷一員。都事二員。吏提控二名。掾史六名。典史二十四名。吏禮房各二名。戶兵刑房各四名。工房

三名。承發二名。勘合科二名。架閣庫一名。知印一名。北京行部。正官尚書二員。侍郎四員。屬官吏曹清吏司。郎中一員。負外

郎一員。主事一員。都吏一名。令史一名。典吏二名。戶曹清吏司。郎中一員。負外郎一員。主事一員。都吏一名。令史一名。典吏十名。禮曹清吏司。郎中

一員。負外郎一員。主事一員。都吏一名。令史一名。典吏二名。兵曹清吏司。郎中一員。負外郎一員。主事一員。都吏一名。令史三名。典吏六名。刑曹清

吏司。郎中一員。負外郎二員。主事四員。都吏二名。令史六名。典吏十八名。工曹清吏司。郎中一員。負外郎一員。主事一員。都吏一名。令史二名。典吏

四名。照磨所照磨一員。檢校一員。司吏一名。典吏四名。司獄司。司獄一員。獄典二名。勘合科典吏二名。架閣庫吏一名。知印一名。北平府改順天

府。官制品級依舊。詳天字北平。行太僕寺。改北京行太僕寺。官制品級依舊。

北京國子監。祭酒一員。司業一員。監丞一員。典簿一員。屬官博士一員。助教二員。學正一員。學錄一員。掌饌一員。

## 上京

羅泌路史夏后氏紀。命豎亥步經大章行緯。暢于八極。方以爲國。十國而有長。長有師。五長而一師。師五十國。州十有二。師州有

牧。牧有師于上京。遼史上京臨潢府。東漢遼東郡西安平之地。新莽曰北安平。太祖取天梯別魯等三山之勢于葦甸。射金甌箭以識之。謂之龍眉

宮。神冊三年城之。名曰皇都。天顯十三年更名上京。府曰臨潢。洙流河自西北南流。遠京三面。東入于曲江。其北東流爲按出河。又有枯河。沙河。黑

河。潢河。鴨子河。他魯河。狼河。蒼耳河。輞子河。臚胸河。陰涼河。豬河。鴛鴦湖。興國。惠民湖。廣濟湖。鹽澤。百狗澤。大神淀。馬孟山。兔兒山。野鵲山。鹽山。鑿

山。松山。平地松林。大斧山。列山。屈劣山。勒得山。唐所封大賀氏。勒得王有。有墓存焉。戶三萬六千五百。轄軍府州城二十五。統縣十。上京太祖創業

之地。負山抱海。天險之以爲固。地沃宜耕植。水草便畜牧。金甌一箭。二百年之基壯矣。天顯元年平渤海歸。乃展郭郭。建宮室。名以天贊。起三大殿。

曰開皇。安德。五鑿。中有歷代帝王御容。每月朔望節辰忌日。在京文武百官並赴致敬。又於內城東南隅建天樞寺。奉安烈考宣簡皇帝遺像。是歲

太祖崩。應天皇后於義節寺斷腕。寘太祖陵。即寺建斷腕樓。樹碑焉。太宗援立晉。遣宰相馮道。劉煦等持節具鹵簿法服。至此冊上太宗。及應天皇

后尊號。太宗詔蕃部並依漢制。御開皇殿。闕承天門受禮。因改皇都爲上京。城高二丈。不設敵樓。幅員二十七里。門在東曰迎春。曰鴈兒。南曰順歸。

西曰金鳳。曰西鴈兒。曰南福。其北謂之皇城。高三丈。有樓櫓。門東曰安東。南曰大順。西曰乾德。北曰拱辰。中有大內。內南門曰承天。有樓閣。東門曰東華。西曰西華。此通內出入之所。正南街東留守司衙。次鹽鐵司。次南門龍寺街。南曰臨潢府。其側臨潢縣。縣西南崇孝寺。承天皇后建寺。西長泰縣。又西天長觀。西南國子監。監北孔子廟。廟東節義寺。又西北安國寺。太宗所建。寺東齊天皇后故宅。宅東有元妃宅。即法天皇后所建也。其南具聖尼寺。綾錦院。內省司。麴院。瞻國省司二倉。皆在大內西南。八作司與天雄寺對。南城謂之漢城。南當橫街。各有樓對峙。下列井四。東門之北潞縣。又東南興仁縣。南門之東回鶻營。回鶻商販留居上京置營居之。西南同文驛。諸國信使居之。驛西南臨潢驛。以待夏國使使。驛西福先寺。寺西宣化縣。西南定霸縣。縣西保和縣。西門之北易俗縣。縣東遼遼縣。周廣順中。胡嶠記曰。上京西樓有色屋市四。交易無錢而用布。有綾錦諸工。宦者翰林伎術教坊角觝儒僧尼道士中國人。并汾幽薊爲多。宋大中祥符九年。薛映記曰。上京者。中京。正北八十里至松山館。七十里至崇信。九十里至廣寧館。五十里至姚家寨館。五十里至咸寧館。三十里度潢水石橋。旁有饒州。唐於契丹嘗置饒樂。今渤海人居之。五十里春和館。度黑水河。七十

里宣化館。五十里長秦館。館西二十里有佛舍民居。即祖州。又四十里至臨潢府。自過崇信館。乃契丹舊境。其南奚地也。入西門。門曰金德。內有臨潢館。子城東門曰順歸。北行至景福門。又至承天門。內有昭德宣政二殿。與廛廬皆東向。臨潢西北二百餘里號涼淀。在饒頭山南避暑之處。多豐草。掘地丈餘。即有堅冰。祖州天成軍上節度。東遼石八部世沒里地。太祖秋獵多於此。始置西樓。後因建城號祖州。以高祖照烈皇帝。曾祖莊敬皇帝。祖考簡獻皇帝。皇考宣簡皇帝。所生之地。故名。城高二丈。無敵棚。幅員九里。門東曰望京。南曰大夏。西曰液山。北曰興國。西北隅有內城。殿曰西明。奉安。祖考御容。曰二儀。以白金鑄。太祖像。曰黑龍。曰清秘。各有太祖微時兵戈器物。及服御皮毳之欸。存之。以示後嗣。使勿忘本。內南門曰興聖。尤之門。上有樓閣。東西有角樓。東爲州廨。及諸官廨舍。綾錦院。班祗候。蕃漢渤海。三百人。供給內府取索。東南橫街四隅。有樓對峙。下連市四。東長霸縣。西咸寧縣。有祖山。山有太祖天皇帝廟。御靴尚存。又有龍門。黎谷。液山。液泉。白馬。獨名天梯之山。水則南沙河。西液泉。太祖陵鑿山爲殿。曰明殿。殿南嶺有膳堂。以備時祭。門曰黑龍。東偏有聖蹤。殿立碑。述太祖遊獵之事。殿東有樓。立碑。以紀太祖創業之功。皆在州西五里。兵衛志。太祖建

皇都于臨潢府。太宗定晉。晉主石敬瑭來獻十六城。乃定四京。改皇都爲上京。有丁一十六萬七千二百。**金史**地理志。太祖武元皇帝。天輔六年春。建上京。曰會寧府。爲上京。其遼之上京。改作北京。先是女真之初。無城郭。止呼曰皇帝寨。國相寨。太子莊。至是改焉。置三省六部。尹貳曹屬。仍令左丞相陳王兀室。撰女真字以行。金之壤地封疆。東極吉里迷。兀的改諸野人之境。北自蒲與路之北。三千餘里。火魯火曠。謀克地爲邊。右旋入秦州。婆盧火所浚界壕。而西經臨潢金山。跨慶桓撫昌淨州之北。出天山外。包東勝。接西夏。逾黃河。復西歷葭州。及米脂寨。出臨洮府會州積石之外。與生羌地相錯。復自積石諸山之南。左折而東。逾洮州。越監川堡。循渭至大散關北。並山入京兆。絡高州南。以唐鄧西南。皆四十里。取淮之中流爲界。而與宋爲表裏。襲遼制。建五京。置十四總管府。是爲十九路。其間散府九。節鎮三十六。防禦郡二十二。刺史郡七十三。軍十有六。縣六百三十二。後復盡升軍爲州。或升城堡寨鎮爲縣。是以金之京府州。凡百七十九縣。加於舊五十一城。寨堡關百二十二。鎮四百八十八。雖真祐興定危亡之所廢置。既歸大元。或有因之者。故凡可考必盡著之。其所不載則闕之。上京路即海古之地。金之舊土也。國言金曰按出虎。以按出虎水源於此。故

名金源。建國之號。蓋取諸此。國初稱爲內地。天眷元年。號上京海陵。貞祐二年。遷都于燕。削上京之號。止稱會寧府。稱爲國中者。以違制論。大定十三年七月。復爲上京。其山有長白青嶺。馬紀嶺。完都魯。水有按出虎。水混同江。來流河。宋瓦江。鴨子河。府一。領節鎮四。防禦一。縣六。鎮一。舊有會平州。天會二年。築契丹城池。後廢。其宮室有乾元殿。天會三年。建天眷元年。更名皇極殿。慶元宮。天會十三年。建殿曰辰居。門曰暉。天眷元年。安太祖以下御容爲原廟。朝殿。天眷元年。建殿曰敷德。門曰延光。寢殿曰宵衣。書殿曰稽古。又有明德宮。明德殿。熙宗嘗享太宗御容於此。太后所居也。涼殿。皇統二年。構。門曰延福。樓曰五雲。殿曰重明。東廡南殿曰東華。次曰廣仁。西廡南殿曰西清。次曰明義。重明後。東殿曰龍壽。西殿曰奎文。時今殿。及其門曰奉元。有泰和殿。有武德殿。有薰風殿。其行宮有天間殿。又刺水之地也。有混同江行宮。太廟社稷。皇統三年。建。正隆二年。毀。原廟。天眷元年。以春亭名。天元殿。安太祖。太宗。徽宗。及諸后御容。春亭者。太祖所嘗御之所也。天眷二年。作原廟。皇統七年。改原廟。乾文殿曰世德。正隆二年。毀。大定五年。復建太祖廟。興聖宮。德宗所居也。天德元年。名之興德宮。後更名永祚宮。睿宗所居也。先興宮。世宗所居也。正隆二年。命

吏部郎中蕭彥良。盡毀宮殿宗廟諸大族邸第及儲慶寺。夷其趾耕墾之。大定二十一年復修宮殿。建城隍廟。二十三年以甃東其城。有皇武殿擊毬校射之所也。有雲錦亭。有臨漪亭。為龍鷹之所。在按出虎水側。會寧府下。初為會寧州。太宗以建都升為府。天眷元年置上京留守司。以留守帶本府尹。兼本路兵馬都總管。後置上京曷懶等路提刑司戶。三萬一千二百七十。舊歲貢秦王魚。大定十二年罷之。又貢猪二萬二千。五年罷之。東至胡里改六百三十里。西至肇州五百五十里。北至蒲與路七百里。東南至恤品路一千六百里。至曷懶路一千八百里。縣三。會寧。倚與府同時置。有長白山。青嶺。馬紀嶺。勃野淀。綠野淀。有按出虎河。又書作阿木濟。有混同江。涿流河。有勝陀國。言忽土。曠葛蠻。太祖誓師之地也。曲江。初名鎮東。大定七年置。十三年更今名。宜春。大定七年置。鴨子河北。盟錄。女真世居混同江之東。長白山。鴨綠水之原。名曰何木火。又曰阿芝川。涿流河。阿骨打建號。改曰皇帝寨。至亶。改曰會寧府。上京。元史。上都路。唐為奚契丹地。金平契丹。置恒州。元初為扎剌兒部兀魯郡王營幕地。憲宗五年命世祖居其地。為巨鎮。明年世祖命劉秉忠相宅於桓州東。涿水北之龍岡。中統元年為開平府。五年以闕庭所在。加號上都。歲一幸焉。至元二年置留守司。

五年升上都路總管府。析津志。

刺幹耳朶者。即世祖皇帝之行在也。每

聖上巡幸上都者。蓋亦以行國賦民力。其聖慮周知。非實以清暑為事也。

此故老相傳。獨異乎。今時所聞。蓋過此口。漢兒山有界限。名鞞鞞山。萬里

如砥。元鄭彥昭檇庵類藁。上京行幸詞。群山如畫列層城。佳氣涿陽此

上京。四野穹廬環魏闕。三宮仗馬擁霓旌。明德城南萬騎過。御天門下

百官多。簫韶九奏風雲會。嵩岳三呼景象和。宮草葱茸拂檻青。苑中麇

鹿自和鳴。雲邊仙子鏘環珮。日暮君王幸穆清。宮樹行行密覆牆。雨餘

沙淨碧雲涼。錦衣花帽金鞍馬。綵仗紅旗夾道光。紅雲靄靄護棕毛。紫

鳳翩翩下綵條。武士承宣呈角觝。近臣侍宴賜珠袍。近西穹帳是青宮。

瑞靄祥雲曉日紅。寶扇初開顏似玉。金輿方駕氣如龍。虞集道園學古錄

泰定甲子上京有感。次韻馬伯庸待制。翰音迎日轂。儀羽集雲路。寂寞

就書閣。老大長郎署。為山望成岑。織錦待盈度。我行起視夜。星漢非故處。

題黃晉卿上京道中紀行詩後。少陵入蜀路。嶮崎故有淒涼五字詩。

供奉翰林隨翠輦。惟應同調不同辭。送袁伯長扈從上京。日色蒼涼

暎赭袍。時巡母乃聖躬勞。天連閣道晨留輦。星散周廬夜屬櫟。白馬錦韉

來窈窕。紫駝銀甕出蒲萄。從官車騎多如雨。祇有揚雄賦最高。吳禮部集

次韻張仲舉助教上京即事 海波填碧湧金鼇。當日經營得俊髦。周鼎  
卜年開帝業。漢都作鎮奠神臯。宮中雙鳳朝扶輦。帳下千牛夜捉刀。萬國  
會同時肆覲。衆星遙共北辰高。大駕時巡鎮北庭。皇風萬里暢威靈。有  
年太史仍書雨。卜日祠官已祭星。白草黃雲秋漫漫。朱樓翠樹晚冥冥。南  
歸却作灤陽夢。應是平生舊所經。翼翼行都歲幸臨。名王諸部集如林。  
氊車滿載彤庭帟。寶馬高馱內府金。暮散歌呼潔水上。夜騰光氣黑山陰。  
世皇謨畧真宏遠。共感湛恩到骨深。虎賁猛士羽林兵。繚繞宮垣帶雉  
城。土冷水泉長凍沍。天低星斗倍光精。穹廬區脫雲彌野。馬渾醜醜雪到  
觥。巷北巷南歌吹雜。祇應儒館自書聲。聖主恭勤服澣衣。頻年羽獵罷  
連圍。金華勸講延髦士。紫殿親祠却宓妃。調鼎有功神化密。扣閣無事諫  
書稀。高秋八月時巡畢。還與都人候六飛。孔鸞斂翅久盤迴。延閣穹崇  
際復開。四海宣文千載仰。兩生接武一時來。綉書共啓緘金匱。持筆行登  
視草堂。努力深期報知己。明時肯負出群才。陰山分脉自崑崙。朔漠縣  
延迤。北門遙見馬駝知牧地。時逢水草似漁村。穹廬敕勒秋風曲。青塚嫺  
娟夜月魂。今日八荒同一宇。向來邊徼不須論。兩都賦意入經營。今日  
竒封有此行。弟子絃歌臨壁水。諸公篇翰出承明。眼中高闕祥雲色。夢裏

空齋舊雨聲。千里相望勞問訊。追攀無路若爲情。亭障連山入杳茫。氊  
車如雪漫沙場。雕盤天際秋雲白。鴈去關東草木黃。獨客應憐冠戴楚。閑  
愁無柰管吹羌。歸來若度桑乾水。莫忘并州是故鄉。灤水縈迴草滿川。  
皇都佳氣鬱浮天。端門高映雙龍闕。馳道中容萬馬韉。群后承恩歌湛露。  
從臣待詔賦甘泉。更聞所過蠲租稅。田野清平樂晏眠。題黃晉卿應奉  
上京紀行詩後 居庸北上一千里。供奉南歸十二詩。紀實全依太史法。  
懷親仍寫使臣悲。牛羊野潤低風草。龍虎臺高樹羽旗。竒絕茲遊陪禁從。  
不才能勿愧栖遲。王沂伊濱集上京詩 離宮金碧鬱岩峩。抵隔灤河一  
水遙。知是上林來進果。鈴聲隱隱轉山腰。黃金布地寶陳華。香漾薔薇  
洗佛牙。甘露穴中遺舍利。神光五色瑩無瑕。曼衍魚龍雜梵儀。金仙來  
降鳳城時。都人稽首瞻雕輦。漠漠祥雲護彩旗。白面王孫家五陵。朝回  
新賜雪毛鷹。金溝芳草公堤綠。蹀躞花駉驕不勝。龍綃衣薄怯新涼。銀  
葉烟消換夕香。休畫脩鬣鬪雙綠。柳風吹淡漢宮黃。滇池細馬四蹄風。  
白玉雕鞍繡結鬃。爭把珊瑚鞭指點。飛塵先入建章宮。鉄播竿下散燈  
回。嵩褐高僧夜呪雷。明日皇家賜酺燕。秋雲漠漠曉光開。轆轤金井促  
晨粧。珠帽紅靴小作行。爭向銀床拾梧葉。夜來秋意到長楊。黃須年少

羽林郎。宮錦纏腰角。觥裝得雋。每蒙天一笑。歸來騎從亦輝光。龍沙白  
草望參差。首着蒲桃記種時。待詔詞臣已華髮。梨園休奏玉交枝。又和

魏伯時灤京秋興薇垣書事二首 秋着龍沙白草纖。周廬擊柝令霜嚴。  
珊瑚鐵網枝應老。仙掌金莖露又添。馳道屬車回豹尾。天門虎士盡虬髯。

仙郎持橐歸來早。馬上尋詩吏隱兼。宋本至治集上京雜詩 西關輪輿  
多似雨。東關帳房亂如雲。復仁門邊人寂寂。太平樓上客紛紛。塞垣蔬

茹黑谷茶。芸桑葉子芍藥芽。誰與南人話櫻筍。北人曾住浙江涯。穹廬  
畫甍繞周遭。五月燕語天窓高。草盡泉枯營帳去。來年何處定新巢。卧

龍岡外有人家。不識江南早稻花。種出磧中新粟賣。晨炊頓頓飯連沙。  
平原細草綠迢迢。十脚穹廬二丈高。羊角風來忽掀去。干霄直上似盤鷗。

衣中流濕著重重。渾似江干梅雨中。却憶錢塘池館曉。沉香新火小薰  
籠。太平生齒日豐隆。赭盡朝河百里松。紅染墻屏朝日麗。黑侵衣桁竈

煙濃。少年跌宕學豪英。以賞為郎隨駕行。醉倒花樓歌扇底。土鉤闌外  
夜吹笙。雨聲纒斷日光出。黑淖如糜撥不開。羸馬巡簷行蹉跎。柴車擊

鼓斷東街。駒駘蹴躡馱馱騰。寶校華鞵簇雉翎。燕散彤宮皆貴近。碎聲  
如雨宰金鈴。柱頭方版赤砂符。植立高城雨映虛。善咒浮圖驚霹靂。阿

香不辭竺乾書。韓媪使酒忽生嗔。打殺隨龍小幸臣。詔獄奏成呼五伯  
歡聲如海頌明君。臘凍徹泉地墳起。土膏春動消成窪。千條萬條壁縫

拆。十家九家屋山斜。破除離索酒千鍾。到處追歡似夢中。盡日笙歌甌  
巷北。初更燈火鉄樓東。御筆園路接柴塲。草地誰分統帳房。細筋入腦

野鷗俊。旋毛在腹官馬良。鷹房晚奏駕鵝過。清曉鑿輿出禁廷。三百海  
青千騎馬。一時隨尾向涼陁。金脊殿洒馬乳酒。鐵幡竿送羊頭神。千兩

官車盡南轉。歸期迎咲問良辰。迺易之金臺集送危助教分監上京 驅  
馬涉大河。堅冰若平地。雪霰在頰髮。顏色漸憔悴。迢遞出恒趙。迤邐入燕

薊。幸託君子交。情親不相棄。裹余屢就宿。下榻辱延致。諄諄味道言。情匪  
骨肉異。振鐸趨雍宮。胄子夙尊畏。適從甘泉幸。晨理赤城轡。我獨增煩憂。

中夜不能寐。疇嘔數千里。欲盡平生意。忽如參與商。令人發長喟。都門候  
迴轅。浙浙秋風至。伍良臣詩上京 龍岡秀色常青青。年年五月來上京。

上京城闕連幽陰。長夏炎日涼風生。平沙遠塞曠萬里。氈車毳幕羅群星。  
時巡王會騁雄俊。控撫荒朔綏邦寧。錦鞍合沓千萬騎。寶鐙鏗戔聲鏘鳴。

駝峯馬漣美奇絕。金蘭紫菊香輕盈。緬懷昔日爭戰地。豈謂今作邦畿城。  
鉄竿屹立海水竭。卧龍飛去空冥冥。上都有山名龍岡。宮闕對之車駕至。

年例直北諸王畢會。金蘭花葉綠如黛。紫菊花大如盃。色深紫。嬌潤可愛。俱在上都。舊為龍淵。錯大保卜吉而視之。龍夕去水竭。遂創宮室。立鉄橋。竿於闕西以鎮之。漣音凍馬乳也。曹子貞詩。上京次王繼學韻。觀光千里外。載筆五雲邊。計拙如工部。文雄愧謫仙。枕流思洗耳。懷祿敢垂涎。疾目昏如霧。衰鬢白勝綿。當辭天祿閣。歸種汶陽田。曉日登山屐。秋風下瀨舩。芝香雲滿地。龜鶴不知年。張仲舉。虬菴集。上京即事。灤河東出水。紫迴。疊坂曾岡擁。復開金柱鎮。龍僧呪罷。玉輿馭象帝。乘來中天星。斗朝黃道。塞漠雲山繞。紫臺欲擬兩京爲。賦頌白頭平子愧無才。又送韓與玉游上京。萬里雲烟渺莽中。野營星散草連空。龍門水合爭秋雨。鴛泊沙明下夕鴻。自昔築臺思郭隗。何人薦賦識揚雄。將書時慰衰年憶。回首貂裘冷朔風。許有壬詩。和開闕宗師至上京韻二首。建甌天下奠皇都。聖祖神功曠世無。灤水清浮金闕動。蹄林晴射錦雲鋪。自憐簪筆螭頭近。深愧盤空鷲影孤。却望居庸南去路。瘦田茅屋香荆湖。夷夏襟喉控兩都。兩都形勢漢唐無。垂衣已定千年治。封事仍求萬字鋪。香殿晝閑雲氣合。瓊樓天迥月輪孤。太平裨贊慚無策。猶幸人間有五湖。又如上京驛。騎年年徧兩京。但慙無賦繼張衡。出城便與青山會。涉世惟催白髮生。新

雨烟蕪皆秀色。嫩涼雲樹已秋聲。尊空客散郵亭遠。恰是思家第一程。又次上京。望望龍岡樹。行人欲解驂。百年蝸角戰。三仕鳳池叅。富貴人難欲。驅馳老豈堪。預知今夕夢。的的到江南。薩天錫詩。上京即事。一派蕭韶起半空。水精行殿玉屏風。諸王拜舞千官賀。齊捧葡萄壽兩宮。上苑棕毛百尺樓。天風搖曳紫絨鉤。內家宴罷無人到。面面珠簾夜不收。中官作隊導宮車。小樣紅靴踏軟沙。昨日內家清暑晏。御羅涼帽插宮花。行殿參差翡翠光。珠衣珠帽宴親王。紅簾高捲薰風起。十六天魔舞袖長。大野連山沙作堆。白沙平地見樓臺。行人禁地避芳草。盡向曲欄斜路來。院院翻經有呪僧。垂簾白晝點酥燈。上京六月涼如水。酒渴天厨又賜冰。祭天馬酒洒平野。沙際風來草亦香。白馬如雲向西北。紫駝銀羗宴諸王。紫塞風高弓力強。王孫走馬獵沙場。呼鷹腰箭歸來晚。馬上倒懸雙白狼。牛羊散漫落日下。野草生香乳酪甜。捲地旋風沙似雪。家家門帳下毡簾。曉來寒襲紫毛衫。睡覺東窓酒尚酣。門外日高晴不得。滿城濕霧似江南。

中京

遼史中京大定府。虞爲營州。夏屬異州。周在幽州之分。秦郡天下是爲遼西。漢爲新安平縣。漢末步奚居之。幅員千里。多大山。

深谷阻險足以自固。魏武北征縱兵大戰降者二十餘萬去之松漠其後拓拔氏乘遼建牙於此當饒樂河水之南温渝河水之北唐太宗伐高麗駐驛於此部帥蘇支從征有功奚良可度率衆內附爲置饒樂都督府咸通以後契丹始大奚族不敢復抗太祖建國舉族臣屬聖宗常過七金山土河之濱南望雲氣有郭郭樓閣之狀因議建都擇良工於燕蘇董役二歲郭郭官掖樓閣府庫市肆廊廡擬神都之制統和二十四年五帳院進故奚王牙帳地二十五年城之實以漢戶號曰中京府曰大定皇城中有祖廟景宗承天皇后御容殿城池湫濕多鑿井泄之人以爲便大同驛以待宋使朝天館待新羅使來賓館待夏使有七金山馬盂山雙山松山河統州十縣兵衛志聖宗統和二十三年城七金山建大定府號中京統縣九轄軍府州城二十三草創未定丁籍莫考可見者一縣

## 五京

郡縣志至德二載十二月置鳳翔府號爲西京與成都京兆河  
南太原爲五京後罷京名冊府元龜肅宗寶應元年詔曰五都之號其來自久宜以京兆爲上都河南爲東都鳳翔爲西都江陵爲南都遼史兵衛志遼建五京臨潢契丹故壤遼陽漢之遼東爲渤海故國中京

漢遼西地自唐以來契丹有之三京丁籍可紀者二十二萬六千一百蕃漢轉戶爲多析津大同故漢地籍丁八十萬六千七百契丹本戶多隸宮帳部族其餘蕃漢戶丁分隸者皆不與焉儀衛志國仗太宗兼制中國秦皇漢武之儀文日至後嗣因之旄頭豹尾馳驅五京之間終歲勤動輟迹相尋民勞財匱此之故歟新唐書北狄傳渤海爲東盛國地有五京以肅慎故地爲上京其南爲中京獫狁故地爲東京沃沮故地爲南京高麗故地爲西京

## 玉京

唐李翰林詩天上白玉京十二樓五城注齊賢五星經云天上白玉京黃金闕太平廣記雲翹夫人贈裴航詩云藍

## 相見上京

東漢書申屠蟠字子龍太尉黃瓊辟不就瓊卒歸葬四方名豪會者

橋自是神仙窟何必區區訪玉京

六七千人互相談論其有及蟠者唯南郡一生與相酬對既別執蟠手曰君非聘徵如是則相見於上京矣蟠勃然曰始以子爲可與言也何意乃相揚教樂貴之徒邪因振衣而去

## 受事上京

太平廣記王法進好道術一日有

仙骨歸心精誠不忘於道敕我迎汝受事於上京也詳仙

## 尊戴中京

宋史列傳吳越國王錢俶上表曰伏念祖宗以

來親提義旅尊戴中京畧有兩浙之土田討平一方之僭逆

**翼翼神京**

宋王與鈞蓋縷葉賀同知啓煌煌樞筦運

籌既付於子房翼翼神京奠枕仍資於公旦

**延譽兩京**

元雲麓文藁勸請圖誦主馬白馬寺主疏延譽兩京豈獨

緇林之美馳聲六詔抑增鄉里之榮

**高麗三京**

隋書列傳高麗王湯遣使詣闕進授大將軍改封高麗王歲遣

使朝貢不絕其國東西二千里南北千餘里都於平壤城亦曰長安城東西六里隨山屈曲南臨淇水復有國內城漢城並其都會之所其國中呼

為三京北史高麗傳其王好脩宮室都平壤城城南唯積倉儲器備寇賊至日方入固守王別為宅於其側不常居之其外復有國內臣及漢城亦

別都也國中稱呼三京宋史以新羅為東州樂浪府號東京百濟為金州金馬郡號南京平壤為鎮州號西京最勝總之凡三京四府八牧郡百有

十八縣鎮三百九十州島三千七百

**東市稱京**

西漢書食貨志王莽特東市稱京

**乃觀于**

**京**

詩篤公劉篇乃觀于京逝彼百泉瞻彼溥原迺陟南崗

**依其在京**

詩大雅皇矣篇依其在京侵自阮疆

注岐周之京也

**蒲輪赴京**

羅泌路史發揮辨帝堯冢篇若蒲輪而赴京緩轡取程非若輕稍少年不召自至衝尹突

蹕蹶坑墜漸而後息也

**景山與京**

周末春秋詩定之方中篇望楚與堂景山與京注景測景以正方面也與既景

迺岡之景同或曰景山名見商頌京高立也詳中

**如坻如京**

詩如坻如京注坻水中之高也京高立也

**京**

管子輕重篇丁桓公曰難賤寡人恐五穀之歸於諸侯寡人欲為百姓萬民藏之為此有道乎管子曰今者夷吾過市有新成困京者二

家君請式壁而聘之桓公曰諾令行半歲民間聞之舍其業而為困京以藏菽粟五穀者過半

**憂心京京**

詩正月篇

念我獨兮憂心京京注京亦大也

**莫之與京**

左傳懿氏卜妻敬仲其妻占之曰吉是謂鳳凰于飛和鳴鏘鏘有媯

之後將育于姜五世其昌并于正卿八世之後莫之與京後魏書賈彞年十歲父坐訕謗繫獄彞訖獲申遠近歎曰此子英英賈誼之後莫之與京

**燕京山**

淮南鴻烈解浚出華竅維出覆舟汾出燕京燕京山名也在太原汾陽汾水所出西南至汾陽冀州浸

**吐**

京郡

晏元獻公類要吐京屬縣石樓後魏置吐京郡即漢土軍胡地故曰吐京水經云在河東路隰州石樓縣

王配

于京

詩下武篇三后在天王配于京注京鎬京也劉公是先生集王配于京賦以王配于京世德作求為韻大哉天祚明德世有哲

王績乃祖之休烈配于京而溥將三后成功達孝思而維則四夷面內知聖德之無疆且昔者群雄紛爭五季昏忒惟我藝祖自天生德內揖讓以興治外征伐以宣力武節颯逝怙惡者喪其巢盛德日新為善者得其職於是餘孽未靖神宗作求躬一戎以歸獸曠百王而繼周正朔所加蓋罔有於不服封禪之禮猶未皇乎聿脩克成大勳用集先帝丕顯元德發明王制上則升中於天下則作程於世故創業如彼之艱難守成若此之昭哲豈非文武並用而治亂隨時明聖不同而述作相繼者哉宜乎世濟厥美王配于京實對越而在上茲適駿有聲亦何必道上古之書希成康之治語鴻荒之事慕堯舜之名且夫湛恩濂涌而易豐憲度著明而不昧故王在京而善繼帝在天而克配豈獨下武之什歌周發於丕承同禪之靈美姬公於哀對且上方法太祖之武以平叛繼二宗之文以永圖越無名之蕩蕩返茲世之于于因斯談之則何貴乎周鎬考於往者將孰先於

浚都客有起而頌曰於皇上天輔景鑠兮有赫天子恢

裸將于京

詩文王篇殷士膚敏裸將于京注周之京師也

于周于京

詩文王篇命此文王于周于京注言天既命文王於周之

曰嬪于京

詩大明篇來嫁于周曰嬪于京



重錄總校官侍郎臣高拱

學士臣胡正蒙

分校官洗馬臣林燝

寫書官主簿臣沈清

國點監生臣馬承志

臣吳璣